

Powšitkowne WOZJEWJENJA

njedźelu, 23. awgusta 2026

Nabožne wusyłanja w serbskim rozhłosu

Katolske nabožne wusyłanje w Serbskim rozhłosu MDR ma tutu njedźelu, 23. awgusta, Chróšćanski farar Měrćin Deleršk. Wotkaz na nabožne wusyłanje w mediatece MDR je pod www.posol.de podaty, zdobom chowa so za QR-codom.

Lětni koncert Meje

Chór Meja přeprošuje na swój lětni koncert, kotryž budže njedźelu, 30. awgusta, w 16.00 hodź. na farskej zahrodze w Radworju. Swačinu poskića hižo wot 15.30 hodź. Džěci rejwarskeje skupiny „Łužičanka“ program sobu wobrubja.

Migracija mjez zmužitosću a mytosami

Z Kulowa pochadźacy pater Fabian Rječka, referent za politisku komunikaciju Jezuitskeje služby za čekancow w Němskej (JRS), přeprošuje zajimcow na zhromadnu rozmołwu wo nazhonjenjach a prašenjach w zwisku z připućowanjom čekancow. Wona wotměje so wutoru, 1. septembra, wot 19.00 do 20.30 hodź. w Budyskim ekumeniskim tachantskim wobchodze. Wón chce starosće a nadžije chutnje brać, mytosy wujasnić a k mjezyčłowjeskemu angažementej pozbudžować. Zarjadowanje skići zdobom dohlad do wšědnego džěla JRS z čekancami a ma wid za čłowjeskosć w debaće rozšěrić.

Slěborny biskopski jubilej w Drježdźanach

Drježdźansko-Mišnjanski biskop Heinrich Timmerevers swjeći sobotu, 5. septembra, slěborny jubilej swojeje biskopskeje swjećizny. Swjedženske kemše su w 10.30 hodź. w Drježdźanskej katedrali. Na nje su wšitcy přeprošeni.

Redakciju Katolskeho Posoła sej wobhladać

Serbski dom wobdźěli so na Dnju wotewrjeneho pomnika njedźelu, 13. septembra, w kotrymž je tež redakcija Katolskeho Posoła zaměstnjena. Wšitcy zajimcy móža sej wot 10.00 do 17.00 hodź. dom bliže wobhladać a mjez druhim rumnosći Katolskeho Posoła wopytać. Wšitcy su wutrobnje witani.

Putnikowanje křižerjow do Roma

Serbscy křižerjo, kotřiž chcedža so klětu na putnikowanju wot soboty do soboty, 1. do 8. meje, wobdźělić, móža so na internetowej stronje www.posol.de abo přez tule podaty QR-code přizjewić. Tam su nadrobne informacije podate.



Swójbne popołdnjo TCM we Wotrowje

Sekcija Swójba Towarstwa Cyrila a Metoda z.t. přeprošuje swójby na zabawne popołdnjo, kotrež wotměje so njedźelu, 13. septembra, we Wotrowje. Spočatk budže w 15.00 hodź. při Starej šuli. Po wsy powjedže Měrko Pohonč. Džěci móža sej při kwisu najwšelakoriše myta zdobyć. Po wodženju su wšitcy na swačinu na farje prošeni.

Na swětowe zetkanje młodžiny do Seoula!

Hosćiciel přichodneho swětowego zetkanja młodžiny budže klětu južnokorejska stolica Seoul. Berlinske arcybiskopstwo kaž tež Zhorjelska, Erfurtska a Drježdžansko-Mišnjanska dieceza poskićuja zhromadnje z pućowanskim běrowom Biblische Reisen ze Stuttgarta zajimowanym młodostnym a młodym dorosćenym 18 do 35 lět jězbu na tele wulkozarjadowanje. Wona wotměje so wot srjedy, 28. julija, do póndžele, 9. awgusta 2027. Wobdžělnikow wočakuja dny zetkanja w južnokorejskim biskopstwje kaž tež poprawne swětowe zetkanje młodžiny w Seoulu z katechezami, modlenjom, koncertami, Božimi mšemi a zetkanjemi z bamžom Lejom XIV.

Na zarjadowanju móža putnicy swětowu cyrkej dožiwić, korejsku kulturu sej zbližić kaž tež zwisk k młodostnym ze wšeho swěta nawjazać. Płaćizna budže něhdže 2.300 do 2.500 eurow wučinjeć, wobsahuje mjez druhim lět, přenocowanja a putniski pakćik. Dokładna płaćizna wotwisuje mjez druhim wot kóštow za lět a wot organizatorskich detailow. Wobdžělnicy ju sčasom a ze zawjazowacym přizjewjenjom zhonja. Njezawjazowace přizjewjenja su hač do póndžele, 31. awgusta, direktnje pola pućowanskeho běrowa Biblische Reisen móžne. Linkaj za to kaž tež k nadrobnějším informacijam stej pod www.posol.de wozjewjenej.